



Broj: UP-I-KSI-09-07/24
Datum: 28.02.2025. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane M. F., iz Brčkog, ulica ■■■■■■■■■■■■ br.■■■■■, člana ■■■■■■■■■■■■ Brčko distrikta BiH, nosioca javne funkcije, na 114. sjednici, održanoj dana 28.02.2025. godine, donosi

RJEŠENJE

1. **UTVRĐUJE SE** da je M. F. iz Brčkog, ulica ■■■■■■■■■■■■ br.■■■■■, član ■■■■■■■■■■■■ Brčko distrikta BiH, nosilac javne funkcije postupio protivno članu 19. i 20. Zakona o sprečavanju sukoba interesa u institucijama Brčko distrikta Bosne i Hercegovine, na način da u Izvještaju o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja, podnesenom dana 20.06.2024. godine nije prijavio podatke o pokretnoj imovini, vrijednosti veće od 5.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, M. F. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Образложење

M. F. obavlja funkciju člana ■■■■■■■■■■■■ Brčko distrikta BiH, na osnovu Odluke broj: ■■■■■■■■■■■■ od 14.03.2024. godine, Rješenje CIK BiH broj: ■■■■■■■■■■■■ od 23.05.2024. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javne funkcije i nosilaca javne funkcije.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Dana 11.12.2024. godine, Komisija za odlučivanje o sukobu interesa po službenoj dužnosti zaključkom, broj: UP-I-KSI-09-07/24, pokrenula je postupak protiv nosioca javne funkcije M. F. iz Brčkog, člana [REDACTED] Brčko distrikta BiH, ulica [REDACTED] br. [REDACTED] jer je posumnjala u tačnost i potpunost podataka u podnesenom Izvještaju o imovinskom stanju, na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog nesaglasnosti između podataka o prijavljenoj pokretnoj imovini u Izvještaju o imovinskom stanju podnesenom dana 20.06.2024. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o pokretnoj imovini nosioca javne funkcije vrijednosti veće od 5.000,00 KM.

Naime, nosilac javne funkcije nije prijavio u Izvještaju o imovinskom stanju pokretnu imovinu vrijednosti veće od 5.000,00 KM, odnosno automobil marke „[REDACTED]“ registarskih oznaka [REDACTED], godina proizvodnje 2017., vlasništvo M. F., nosioca javne funkcije, čime je postupio protivno odredbama člana 19. stav (1) i stav (2) te člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim Zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema Zaključka o pokretanju postupka, broj: UP-I-KSI-09-07/24 od 11.12.2024. godine, zaprimljen dana 16.12.2024. godine, nosilac javne funkcije, M. F., član [REDACTED] Brčko distrikta BiH, Komisiji za odlučivanje o sukobu interesa dostavio je Izjašnjenje u kojem je između ostalog naveo da nije imao namjeru da prikriva imovinu, te da nije vlasnik niti posjednik predmetnog vozila, što je vidljivo iz punomoći sačinjene prije više od 6 (šest) godina kojom je opunomoćio lice K. S. iz [REDACTED] da vozilo može, između ostalog, registrovati i odjaviti i same njene izjave sačinjene dana 18.12.2024. godine, kao stvarne i faktičke vlasnice. M. F. smatra da je pogrešan zaključak da je on vlasnik predmetnog vozila samo zato što je tako upisano u evidenciju Odjeljenja za javni registar Vlade Brčko distrikta BiH.

Takođe, u istom izjašnjenju M. F. dostavio je ugovor o posredovanju u trgovini motornih vozila, zaključen dana 20.07.2018. godine, između M. F., kao vlasnika, sa jedne strane i preduzeća „[REDACTED]“ s.p. Brčko, kao posrednika, sa druge strane. U istom ugovoru predmet prodaje je automobil marke „[REDACTED]“ registarskih oznaka [REDACTED], godina proizvodnje 2017., a ugovorena cijena navedenog automobila je 23.000,00 KM, te je kupac automobila K. S. iz [REDACTED].

Uvidom u dostavljene podatke od strane Odjeljenja za javni registar Brčko distrikta BiH, Pododjeljenja za lična dokumenta kao i izvoda koji posjeduje Komisija, vidljivo je da M. F. nosilac javne funkcije, u svom vlasništvu, pored prijavljene pokretne imovine, ima registrovan i automobil marke [REDACTED], registarskih oznaka [REDACTED], godina proizvodnje 2017.

Naime, članom 19. stav (4) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije odgovara za tačnost i potpunost podataka u Izvještaju za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, a stavom (2) istog člana, između ostalog propisano je da Izvještaj sadrži lične podatke nosioca javne funkcije i članova

njegove uže porodice, uključujući JMB, podatke o funkciji koju nosilac javne funkcije obavlja, dok je tačkom c) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu, dok je članom 20. stav (3) tačka b) Zakona propisano da Izvještaj sadrži podatke o stečenoj imovini, o pokretnim stvarima veće vrijednosti, te shodno stavu (4) istog člana Zakona, pod pokretnim stvarima veće vrijednosti, između ostalog, smatraju se vozila pojedinačne vrijednosti veće od 5.000,00 KM.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, imajući u vidu da M. F. nije u Izvještaju o imovinskom stanju podnesenom dana 20.06.2024. godine Komisiji za odlučivanje o sukobu interesa prijavio sve podatke o pokretnoj imovini vrijednosti veće od 5.000,00 KM, međutim, nosilac javne funkcije u izjašnjenju od 27.12.2024. godine dostavio je dokumentaciju iz koje je vidljivo da navedeni putnički automobil nije u posjedu M. F., ali u registru podataka Odjeljenja za javni registar Brčko distrikta BiH, Pododjeljenja za lična dokumenta, da M. F. upisan je kao vlasnik putničkog automobila marke [REDACTED], registarskih oznaka [REDACTED], godina proizvodnje 2017., te shodno tome imao je obavezu prijave pokretne imovine nosioca javne funkcije, odnosno navedenog automobila u Izvještaj o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, čime je u ovom slučaju nosilac javne funkcije postupio protivno odredbama člana 19. i 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije obavezan je provesti do kraja proceduru vezanu za predmetni automobil u Odjeljenju za javni registar Brčko distrikta BiH ili izvršiti dopunu Izvještaja o imovinskom stanju nosioca javne funkcije, navodeći i automobil marke [REDACTED], registarskih oznaka [REDACTED] koji se trenutno vodi na njegovo ime.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, vodeći računa o težini i posljedicama povrede Zakona, te postupanju i odgovornosti ali i činjenici da je M. F. 20.07.2018. godine prodao odnosno otuđio automobil marke [REDACTED], ali da nije nadležnom Javnom registru priložio ugovor i izvršio odjavu predmetne pokretne stvari, ličnosti nosioca javne funkcije, te da je ovo prvi izvještaj koji je nosilac javne funkcije podnio, kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici, radi o očito lakšem obliku kršenja odredaba Zakona, koje nisu nanijele štetu integritetu javne funkcije koju M. F. obavlja, Komisija je stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. 38 i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

- M. F., ul. ■■■. ■■■■■■■■■■ br. ■■■, Brčko,
- Evidencija,
- Arhiva.